

INUIT ATAQATIGIIT

INATSISARTUNI



UPA16/83
27. april 2016
Aqqaluaq B. Egede

Siunnersuut tunngavimmigut inuiaqatigiinni oqartussaaqataanerup nukittuumik inissisimanissaanik qulakkeerinninnissamik siunertaqarpoq. Siunnersuutimmi tunngavigaa uran pillugu apeqqut imaannaangitsoq assigiinngitsunillu isummanik pilersitsisoq pillugu inuiaat nunatsinni taasitinneqarnissaat. Inuit Ataqatigiit isumaqarpugut pissaaneq inuiaqatigiit pigisaat Naalakkersuisunut aamma Inatsisartunut ilaasortaniit attartugaq mianersortumik qarsupiinnanngitsumillu aqutsinissamik pisussaaffiliisuusoq. Tamannaavormi oqartussaaqataanerup tunngaveqartut katitigaaneranni pisussaaffiusoq.

Matumanili siunnersuuteqartup saqqummiussaa tunngavigalugu qulequtsiussami pingaarutillit arlallit suli qulaajarneqarsimanngitsut pingaaruteqartullu amigaatigigatsigit Inuit Ataqatigiinniit erseqqissassavarput. Tassami Uranisiorumasuniit suli qulakkeerineqanngilaq avatangiisinut, peqqissutsimut, uumassusilinnut aammalu aqqissuusaanerup qanoq ilusiligaanissaanik pilersaarutit amigaataammata. Taakkuuppummi siunnersuummi qulequttap kisitsisitalersugaanerata aamma sunniuteqarfigisinnaasai.

Isumaqarpugut siunnersuummi isiginngitsuusaarneqarsinnaanngitsut pingaarutillit aamma naalakkersuisooqatigiit tamakkerlutik pingaartittariaqaraat tassaasut, inuit nunatsinni oqallitsinneqarnissaat aammalu paasititsiniaaffigineqarnissaat tamatumalu kingorna taasitinneqarnissaat assut nunatta inuisa kissaatigigaluarat. Tamanna Inuit Ataqatigiit nalorninartoqartingilarput. Tassa, inuit nunatsinni taasitinneqarniarlik.

Sooq Uranisiussaagut inuit nunatsinni amerlanerussuteqartut Uran-mut akerliussagaluarpata? Sooq inuit taasitinneqarnissaat ajorpa? Sunaana inoqatitta naleqassusaanniit piumasaanniillu pingaarnerulersimasoq? Susoqartoruna? Sooruna GME-p ajuallatsinnginnissaa nunaqqatitta ajuallatsinnginnissaanniit pingaartinneqarnerusoq?

Inuiattut immitsinnut aperiniarta nunarput uranimik piiiaffinngussanersoq. Nunarput pissutsinut allarlunnarnut aamma ajutoortoqariataartillugu aningaasartuuterpassuaqarnissaminut pisussaaffeqalissanersoq nunap inuisa aalajangiiffigisariaqarpaat.

Neriulluta naalakkersuisooqatigiit inuit nunatsinni taasitinneqarnissaat aamma anguniarsinnaassagaat. Inatsisartunut ilaasortat immiussuseqarlutik taasinissaat pisariaqartipparput. Allanit sunnerneqarsimasutut qulangersimaneqartutullu aalajangersaaneq qimanneqartariaqarpoq. Taamatut oqaaseqarluta siunnersuut taamatut isikkoqartillugu itigartipparput. Taamaakkaluortoq innuttaasut taasitinneqarnissaat pillugu naaperiarfissarsiornissarput itigartingilarput. Neriulluta siunnersuutip oqallisigineqarnerani katersuuttoqarsinnaassasoq.